



Republika e Kosovës / Republic of Kosovo

Kuvendi i Komunës Rahovec

Opština Skupština Rahovac / Municipality of Rahovec

PROCESVERBAL

Nga mbledhja e rregullt e Kuvendit Komunal të Rahovecit, e mbajtur më **29.06.2020**, me fillim në ora **10:00**. Mbledhjen e kryesoi: Kryesuesi i Kuvendit z. **Afrim Dina**. Konstatohet se kuorum, për mbajtjen e mbledhjes kemi:

Kryesuesi – Fillimisht më lejoni t'iu përshëndes, i nderuar Kryetar i Komunës z. **Smajl Latifi**, nënkryetar i Komunës z. **Fatmir Iska**, të nderuar kuvendarë, drejtor të drejtorive Komunale, përfaqësues të mediave dhe ju gjithë të pranishëm.

Para se me fillua punimet për mbledhjen e radhës, fjalën ja kisha dhënë Kryetarit të Komunës z. Smajl Latifi për shkak se do të ketë një udhëtim.

Kryetari – Përshëndetje për Kryesuesin e Kuvendit z. Afrim Dina, anëtarët e kuvendit të Komunës, drejtorë të drejtorive dhe gjithë ata që po e përcjellin këtë seancë të rregullt të Kuvendit të Komunës. Unë besoj që edhe në emër tuajin por edhe në emër të qytetarëve të komunës dëshiroj të shprehë papajtueshmërinë, kundërshtimin dhe indinjatën për propozim aktakuzat e ngritura nga prokurori i dhomave të specializuara të Gjykatës Speciale në Hagë kundër Presidentit të Republikës së Kosovës z. Hashim Thaqi dhe kundër ish-kryetarit të Kuvendit të Kosovës dhe Kryetarit të Partisë Demokratike të Kosovës z. Kadri Veseli si dhe të tjerëve që ende nuk dihet që së paku zyrtarisht se kush janë. Besoj që është e arsyeshme që të shprehim ndjenjat tona njerëzore si qytetarë të Komunës së Rahovecit pasi komuna jonë ka pasur humbje të mëdha dhe ka përjetuar tragjedi të mëdha ku ka humbur shumë njerëz në luftën e fundit ku aparati shtetëror në mënyrë të organizuar i pushtuesit serb ka kryer krime çnjerëzore kundër qytetarëve janë të paarmatosur e të pambrojtur vetëm pse kanë qenë shqiptarë. Janë dhjetë masakra në komunën e Rahovecit të cilat janë kryer në periudhën 98-99 të shekullit të kaluar, janë 64 të zhdukur vetëm nga Krusha e Madhe përfshirë edhe profesorin e nderuar Ukshin Hoti. Në këto masakra janë vrarë e keqtrajtuar, masakruar e janë djegur e zhdukur gra, pleq, burra e fëmijë. Gjykata speciale është gjykatë një etnike dhe si e tillë është e padrejtë dhe e papranueshme ngase pretendon të zbardhë të ashtuquajturat krimet e pretenduara siç thuhet të pjesëtareve të Ushtrisë Çlirimtare të Kosovës. Lufta për Liri e popullit tonë ka qenë luftë që ka dëshmuar se ka vlera të veçanta, vlera historike dhe njerëzore, qytetare, kulturore edhe të trashëgimisë dhe këtë luftë që ju imponua popullit shqiptar që të zgjedh mjetet e duhura në kohën e duhur, e kanë përkrahur dhe mbështetur edhe forcat ajrore të NATO-s në krye me Shtetet e Bashkuara të Amerikës dhe si e tillë mbetet dhe vazhdon e sigurisht që do të mbetet përjetësisht edhe në kujtesën tonë edhe në histori pra edhe në kujtesën e brezave që do të vijnë pas nesh luftë e drejtë, e luftë për liri, luftë mbrojtëse, pra luftë që dëshmon vlerat e drejtësisë humanizmit pastërtisë dhe vlerat e një lufte e cila ka përfaqësuar të drejtat e një populli i cili ka qenë i shtypur i robëruar e i keqtrajtuar i persekutuar nga shteti serb. Unë personalisht edhe si Kryetar Komune jam kundër aktakuzave të cilat i cilësojmë që janë të padrejta dhe kundër çfarëdo tendence që tenton me vendosur baraspeshe midis luftës së popullit tonë që ishte luftë e drejtë për liri e mbrojtëse e çlirimtare dhe luftës së Serbisë e cila ka pasur vetëm një qëllim të mbajë të pushtuar këtë popull, të përdor skenarë dhe plane antishqiptare madje duke përfshirë edhe skenarë të shfarosjes dhe dëbimit të popullsisë. Duke qenë se jemi në një trevë që ka humbur shumë mbi 1000 të vrarë e të masakruar, duke qenë se jemi nga një trevë e cila ka përjetuar tragjedi e dhimbje pafund, duke qenë se jemi nga një trevë që ka ende plagë të hapura dhe ende të pagjetur, natyrisht unë shpreh bindjen time edhe shpresoj të shumicës dërmuese të qytetarëve të komunës së Rahovecit se tendenca për ta njollosur luftën çlirimtare të Ushtrisë Çlirimtare të Kosovës përveç se është e padrejtë, është diskriminuese e po ashtu edhe në kundërshtim me vlerat demokratike e paqedashëse dhe me vlerat më të mira që ka populli ynë dhe popujt liridashës të botës

demokratike. Shpreh kundërshtimin kundër propozim aktakuzës ndaj z. Thaqi dhe z. Veseli dhe të tjerëve duke qenë të bindur jo vetëm me pafajësinë e ish eprorëve e ish udhëheqësve të luftës së Ushtrisë Çlirimtare të Kosovës, duke qenë të bindur se nuk munden të gjinden askund pjesëtarë të UÇK-së që kanë kryer krime kundër popullatës civile, kundër popullatës së paarmatosur ashtu siç kanë kryer krime që bota i din dhe i ka gjykuar, e ato janë krimet serbe të cilat ishin krime lufte, krime ndaj njerëzimit, torturë, vrasje, keqtrajtime, burgosje, dëbim me dhunë e madje edhe plane për shfarosje. Pra Serbia është agresori ndërsa ne jemi ata që jemi mbrojtë nga agresori serb. Rroftë lufta e popullit tonë për liri e i përjetshëm kujtimi për Dëshmorët e Martirët e kësaj lufte kurse aktakuzat e tilla vetëm se do të na forcojnë edhe unë kërkoj që ta kemi parasysh faktin se sa i nevojshëm e jetik dhe i domosdoshëm është uniteti brenda nesh në mënyrë që të kundërvihemi tendencave armiqësore që kanë për qëllim ta njollosin luftën tonë. Faleminderit shumë

Kryesuesi – Faleminderit shumë kryetar për shprehjen e shqetësimit që po na bëhet, dhe ftesave ndaj luftëtarëve dhe ushtarëve tanë.

Të nderuar kuvendarë, për këtë mbledhje sot propozojmë këtë :

REND DITE

1. Shqyrtimi dhe aprovimi i Procesverbalit nga mbledhja e kaluar,
2. Pyetjet dhe përgjigjet në pyetjet e kuvendarëve,
3. Shqyrtimi dhe aprovimi i Kornizës Afatmesme Buxhetore (KAB) 2021-2023,
4. Shqyrtimi dhe aprovimi i Draft – rregullores për taksa komunale,
5. Shqyrtimi dhe aprovimi i propozim vendimit të Kryetarit të Komunës për faljen e borgjit për taksë komunale.

Të nderuar kolegë kuvendarë, a jeni për këtë rend dite. Konstatoj se unanimisht aprovohet rendi i ditës. Kalojmë në pikën e parë të rendit të ditës:

1. Shqyrtimi dhe aprovimi i Procesverbalit nga mbledhja e kaluar.

A ka dikush diçka rreth procesverbalit të mbledhjes së kaluar dhe nëse jo atëherë e qesim në votim. Konstatoj se unanimisht aprovohet pika e parë e rendit të ditës. Kalojmë në pikën e dytë të rendit të ditës :

2. Pyetjet dhe përgjigjet në pyetjet e kuvendarëve .

Masar Popaj – Përshëndetje kryesues, nënkryetar, drejtor të drejtorive, delegate dhe ju gjithë të pranishëm. Pyetja ime ka të bëjë me rrugën Fortesë-Celinë dhe këtë pyetje i drejtohem drejtorisë përkatëse dhe njëherësh desha të uroj për punën që po kryhet në terrene në riparimin e rrugëve të asfaltuara si në qytete ashtu edhe në fshatra. Por e shoh më se të nevojshme rrugën Fortesë Celinë pasi që kjo rrugë është më e dëmtuara në krahasim me këto rrugët tjera që po riparohen. Këtë mund ta dëshmojnë edhe kolegët e mi delegatë si Kryesuesi Afrim Dina, Faton Ramadani, Rasim Fazliu pastaj drejtori Rumir Zhuniqi dhe të tjerët. Kjo rrugë më së shumti është e dëmtuar sidomos në fshatin Fortesë në lagjen e Zhuniqëve, kështu që pres një përgjigje nga ju se kur do të bëhet riparimi i kësaj rruge.

Sali Sallteku – Përshëndetje për të gjithë të pranishmit, pasi kolegu i përmendi rrugët atëherë edhe unë po shkoj te rruga kryesore. Vërtet është e mundimshme me ardh në Rahovec pasi firma e cila është duke punuar në segmentin prej në dalje nga Fortesa e deri te Stone Castle është e mundimshme me kalua andej. E pakuptueshme se si punohet aty dhe krejt në mënyrë të panevojshme e kanë prishë rrugën ashtu. Kryetari na kishte thënë se është një firmë e mire dhe serioze mirëpo nga ajo që po shihet del e kundërta pasi vërtet është firmë e dobët. Nuk e di vërtet si qëndron puna rreth kësaj mirëpo e shoh që pjesa tjetër e segmentit ku punohet nga kompania Euroasfalt duket se po punohet mirë dhe me intensitet, kurse në atë pjesën andej vërtet e

tmerrshme si punohet në atë mënyrë. Po ashtu unë desha me bo një kërkesë pasi në emër të fshatit veç e kam bërë në mbledhjen e kaluar edhe përgjigja e nënkryetarit ishte se nuk kanë kërkuar participim nga komuna. Mirëpo unë e di se çdo kërkesë që bëhet për diçka, sigurisht edhe komuna participon me një shumë të caktuar dhe ne si fshat i kemi grumbulluar mbi 50,000 euro për rregullimin e asaj odës së fshatit. Unë nuk po kërkoj që komuna të participoj 80% kurse ne si komunitet me 20% por e kundërta 80% e paguajmë ne si fshat kurse komuna të merr pjesë me 20% dhe sigurisht që Kryetari duhet ta ketë parasysh këtë dhe sigurisht e mirëpërsim edhe ndihmën e komunës pasi është vullnet i qytetareve aty, pasi kanë mbledhur 40,000 euro dhe tash nuk kanë mundësi edhe me krye këtë kështu që komuna duhet me marr pjesë me shumë të caktuar, pasi një bashkësi lokale që i qet 80% të mjeteve atëherë 20% duhet të jetë pjesëmarrës komuna, edhe konsideroj që duhet të dërgohet kjo porosi në vendin e duhur dhe sigurisht që pres edhe një përgjigje rreth kësaj. Faleminderit!

Hanalora Hoti – Përshëndetje për të gjithë të pranishmit. Unë desha të ja bëj një pyetje drejtorit të Bujqësisë se a ka filluar përgatitja për hapje të thirrjes për pagesa direkte ose subvencione, kur do të filloj puna me orar të rregullt dhe a kanë me qenë të hapura sërish zyrat në disa fshatra përkatësisht në Ratkoc dhe Krushë të Madhe për pritjen e fermerëve. Faleminderit!

Besa Bytyqi – Faleminderit kryesues, të nderuar kolegë, unë kam dy pyetje drejtuar drejtorit të Shërbimeve Publike por si duket Përparimi nuk qenka prezent. Uji në Opterushë është një problematikë që është tejet shqetësuese për banorët e asaj ane dhe e kemi burimin tonë që menaxhohet prej KRU Gjakova mirëpo uji nuk është 100% i pijshëm pra është një problem që po i shqetëson tash e sa vite banorët e asaj ane duke përfshirë edhe Zoqishtin edhe fshatrat përreth. Unë kërkoj nga Kryetari i Komunës pastaj nga Drejtori i Shërbimeve Publike që në bashkëpunim me KRU Gjakova të gjejnë një zgjidhje sa më të shpejtë për këtë problematikë. Ndërsa pyetja tjetër është gjithashtu për drejtorin e Shërbimeve Publike e saktësisht për kompaninë e mirëmbajtjes se hapësirave të gjelbëruara. Tash e sa kohë ata nuk po i përmbahen kontratës pasi ne e dimë që në momentin që e nënshkruajnë kontratën atëherë dalin obligime kontraktuale për të dyja palët ndërsa kompania nuk po e bën një gjë të tillë, që do të thotë se kompania e bën punën ashtu pa kontroll edhe paguhet me taksat dhe paratë e qytetareve tanë. Kërkoj që të bisedohet seriozisht me kompaninë dhe jo të mbetet bari ashtu siç e kanë hequr pa e mbledhur dhe pa e ujitur. Faleminderit!

Ali Zhuniqi – Përshëndetje kryesues, përshëndetje për të gjithë kolegët në sallë. Në lidhje me çështjen e rrugës Fortesë- Celinë, kjo ishte kërkesë edhe para një viti dhe nuk është marr asgjë në këtë drejtim pra është për keqardhje sidomos për banorët aty. Por une kam edhe një kërkesë tjetër në lidhje me ndërtimin e rrugës që është duke u bërë katër korsi Rahovec-Xërxe. Gjate kohës kur e vijoj e shoh se ka mungesë të sinjalizimit për njoftimin e qytetarëve të cilët e përshkojnë këtë rrugë që po besoj edhe ju vet keni mundësi me pa e sidomos natën, që ka një mungesë të profesionalizmit të drejtimit sa i përket sinjalizuesve për me i njoftua qytetarët pasi duhet me marr seriozisht sepse paraqet rrezik edhe tash një ndeshje në komunikacion e dimë se cilat janë rreziqet, kështu që kisha kërkuar të bëni një kërkesë për sinjalizime.

Trajko Shariq - Përshëndetje për të gjithë, desha shkurtimisht t'ju informoj për zjarr vënie të qëllimshme të një shtëpie të nacionalitetit serb, në lagjen e epërme të Rahovecit, gjë e cila i ka shqetësuar banorët e asaj ane, si banor të nacionalitetit serb ashtu edhe atë shqiptarë. Prandaj ju lus që nëse dikush e keni ndonjë informatë, të njëjtën ta përcillni qytetarëve dhe ti tregohet se deri ku është arritur me hetimin e rastit.

Rukije Krasniqi – Përshëndetje për të gjithë pjesëmarrësit në sallë. Unë e kam si kërkesë nga fermerët të cilët kanë fituar serra edhe kanë kërkuar që a ka mundësi që me zbrit 20% edhe me bo në 10% të përfitimit të serrave të pagesave të tyre. Edhe pyetja e dytë ishte përgjatë rrugës Vrajak – Bratotin –Ratkoc pranë një përroskë kundërmon një erë e keqe dhe e padurueshme për banorët e asaj lagje, pasi aty derdhet kanalizimi i

fshatit Vrajak dhe kjo është e papërballueshme për banoret e lagjes për shkak të erës që kundërmon aty dhe kjo është mjaft shqetësuese edhe për kalimtarët aty por edhe banorët që jetojnë aty përreth. Faleminderit!

Kryesuesi – Faleminderit shumë e nderuara Krasniqi, atëherë meqë nuk kemi tjerë të lajmëruar, pyetjet që janë bërë nga kuvendarët, ndoshta nënkryetari apo drejtorët që janë prezent dhe që ju kanë drejtuar me pyetje.

Fehmi Hoxha – Përshëndetje kryesues, nënkryetar, kolegë kuvendarë, drejtorë të ekzekutivit dhe gjithë të pranishmit në sallë. E di që këto që do të themi nuk janë ne rend të ditës mirëpo paraprakisht para se me hy në temë. Unë propozoj që shefat e grupeve të mbledhen për një pauzë të shkurtër dhe të dalim me një deklaratë për supozim ose ngritjen e aktakuzave ndaj çlirimtareve edhe ne si Kuvend të miratojmë një deklaratë. Pra do të ishte mirë për një pauzë të shkurtër, të mbledhen shefat e grupeve dhe dikush nga ata të lexoj deklaratën.

Kryesuesi – Faleminderit shume z. Hoxha, personalisht pajtohem me propozimin tuaj, mirëpo para se me marr pauzën atëherë po vazhdojmë me përgjigjet të cilat i ka nënkryetari për pyetjet që janë ngritë prej kuvendareve dhe drejtorët për ata që janë prezentë këtu mund të japin përgjigje. Pasi të përfundon përgjigjet nënkryetari atëherë shefat e grupeve mbledhen ne zyrën e kryesuesit. Faleminderit!

Fatmir Iska – Faleminderit i nderuar Kryesues, te nderuar anëtarë të Kuvendit dhe përshëndetje për të gjithë të pranishmit në sallë. Unë do të mundohem të jap përgjigje për ato që jam në dijeni, drejtorët mund të japin përgjigjet e tyre dhe po ashtu është e drejtë edhe me shkrim të japin përgjigjet në mungesë të drejtorëve që nuk janë prezentë. Pyetja nga Masar Popaj për rrugën Fortesë - Celinë a do të bëhet riparimi? Ne kontratën e kemi dhe është aktive mirëpo buxhet nuk ka por duhet të lutim operatorin pastaj do të shohim në rishikim apo ridestitim dhe shpresojmë që kjo të shtrohet me një shtresë të asfaltit. Meqenëse e kemi kontratën, po besoj që e kemi me lehtë e pastaj për buxhet do të mundohemi me gjete mjete shtesë për këtë rrugë, pasi edhe unë po kaloj andej e jo veç ata që përmendet ju dhe gjithë ne kalojmë atypari dhe vërtet është e dëmtuar dhe jo në gjendjen e mirë ajo rrugë, njëkohësisht përgjigja është edhe për Ali Zhuniqin për këtë rrugë. Pastaj z. Sali Sallteku ka bërë pyetje për rrugën katër korsi prej Fortesës e deri në Stone Castle. Edhe unë kam vërejtjet e mia për këtë rrugë pasi aty krijohet pluhur i madh, mungese e sinjalistikës dhe të gjitha këto qëndrojnë. Ne si komunë e kemi dhënë maksimumin tonë rreth angazhimit për këtë por sigurisht që do të përdorim edhe elementet represive ndaj operatorit i cili punon aty dhe e ka për obligim pasi ka lidhë një kontratë pra është i obliguar për atë punë. Do të bisedojmë edhe me drejtorin e shërbimeve publike edhe me menaxherin Sylejman Daka që njëkohësisht të mbikëqyrët kjo punë pasi vërtet është ashtu siç e keni parashtuar pyetjen tuaj. Ndërsa tek pyetja e dytë oda e fshatit, në këtë pyetje ju kam përgjigjur edhe në seancën e kaluar në mbledhje të KPF-së, se kërkesa e fshatit ka qenë ju do ta ndërtoni atë shtëpi me vetëfinancim pasi ashtu është bërë kërkesa nga kryetari i fshatit. Por, unë them që ju duhet t'i drejtoheni kryetarit të Komunës me një kërkesë, të kërkonti mbështetje apo participim për ndërtimin e asaj ode por unë do të përmendi vetëm dy prej këtyre odave apo shtëpive të fshatit që i kanë bërë me mjete vetanake. Pra në Drenoc lagja e Berishëve e ka të ndërtuar me vetëfinancim dhe në Senoc që kalon skaj rrugës dhe ne i kemi ndihmuar atyre në rregullimin e një pjese të oborrit në Senoc. Por, kjo nuk do të thotë që ne nuk e ndihmojmë, ndoshta me 20% te mjeteve nuk lidhim marrëveshje ose një memorandum për bashkëfinancim por asistojmë në ndihmë tjetër qoftë të rrugës apo edhe diçka tjetër. Pyetja nga Hanalora Hoti rreth thirrje për aplikim për subvencione. Ministria e Bujqësisë ka ndërmarrë disa hapa dhe ne po presim që ajo thirrje të vijë tek ne dhe të filloj aplikimi për subvencione. Ne jemi të gatshëm ashtu siç kemi vepruar edhe vitin e kaluar do të jenë përsëri 3 qendra të aplikimit, pra është këtu në Komunë pastaj në Krushë të Madhe dhe ne Ratkoc. Të gjitha përgatitjet janë në rregull dhe në momentin se bëhet thirrja, ne do të fillojmë me punë. Besë Bytyqi për ujin në Opterushë edhe kompania për hapësira publike. Ju e keni më se afërmi drejtorin e Shërbimeve Publike dhe sigurisht që ju jep një përgjigje adekuate për këtë. Tek kompania për hapësira publike ata i kanë të kontraktuar se çka kanë me krye pasi të gjitha janë të definuar në kontratë mirëpo ne mundemi me kërkua edhe ajo qëndron pasi ka shume rrugë

pothuajse ne çdo vendbanim ku ka barishte të mëdha janë të pa pastuara si dhe për ujin me sa e di unë Oplotusha furnizohet prej burimit pasi e ka burimin e vet. Ne do të bisedojmë edhe me KRU Gjakova se çka mund të bëhet për kyçje nga Retija por prapë do të bisedoj me drejtorin e Shërbimeve Publike për këto dy pyetje që ju i parashtuat. Tani nuk mundem me ju dhanë përgjigje të sakta përderisa nuk i kemi edhe atë. Tek asamblisti Ali Zhuniqi kishim dy pyetje edhe u përgjigja edhe në pyetjet e Masarit. Pastaj Trajko Shariq rreth zjarrit në shtëpinë në Lagjen e Epërme, sipas informatave që ne kemi zjarri ka qenë i natyrshëm, nga diçka brenda që është krijuar por sidoqoftë kjo ju takon organeve dhe kompetencë e policisë pasi është lajmëruar rasti por edhe komisionet përkatëse të AME-s të zjarrfikësve këtu që bëjnë raporte edhe pastaj do të shohim rreth kësaj. Tash për momentin mundemi veç me paragjykua se çka, pasi nuk ka motive tjetër përpos zjarrit natyral që ka ndodhur natyrshëm që ndodh edhe ne shtëpitë tjera. Pra të mos i japim etiketim që kjo shtëpi është e serbit, shqiptarit apo komunitetit RAE, por është një shtëpi që ka ndodhur zjarri fatkeqësisht. Tek asambleistja Rukije Krasniqi rreth zbritjes se participimit për serra nga 20% ne 10% që me herët ka qenë 75% me 25% pastaj ne e kemi zbritur nga 80% ne 20% dhe thirrja ka qenë dhe është nënshkruar kontrata dhe ka marr fund d.m.th. nuk mundet me u zbrit.

Kryesuesi - Faleminderit shumë nënkryetar, meqë nuk kemi tjerë të lajmëruar, kalojmë në pikën e tretë të rendit të ditës:

3. Shqyrtimi dhe aprovimi i Kornizës Afatmesme Buxhetore (KAB) 2021 – 2023.

Afrim Limani – I nderuar kryesues, nënkryetar, asamblistë dhe gjithë ju të pranishëm. Me datë 15.05.2020 në adresë të Komunës së Rahovecit ka arrite qarkorja e parë buxhetore, ku janë përcaktuar limitet apo tavanet buxhetore për komunën e Rahovecit për vitin 2021, si dhe projeksionet për vitin 2021, 2022 dhe 2023.

Buxheti i Komunës së Rahovecit për vitin 2021 në total është prej 14,548,823 euro, që ka një ndryshim negativ apo me i vogël në raport me vitin 2020 në shumën prej 186,996 euro. Pra granti i përgjithshëm është 186,996 euro si rezultat i zvogëlimit të grantit të përgjithshëm dhe grantit të arsimit. Granti i Arsimit është i zvogëluar në shumën prej 75,214 euro ndërsa granti i përgjithshëm 173,251 euro. Ndërsa ka një rritje simbolike të grantit të shëndetësisë në vlerë prej 61,345 euro dhe në total ndryshimi është negativ apo me i vogël në krahasim me vitin aktual që jemi në vitin 2020. Shtrohet pyetja se pse është zvogëlim i buxhetit, që sipas eksperteve të cilët merren me analiza financiare dhe projeksione në vitet në vazhdim, do të thotë pasojat e Covidit do të i bartim edhe në vitin 2021 do të thotë kjo është arsyeja sipas tyre. Ne si drejtori e Financave KAB-in komunal e kemi përgatitë si dokument, ku pjesa teorike që është objektiva dhe sqarimet ndërsa ka mungesa të theksuara që pa ardh qarkorja e dytë buxhetore ne nuk mundemi me ditë saktë sa do të i kemi edhe kategoritë ekonomike pra pozicioni i pagave, mallrave, investime kapitale. Mirëpo ne si drejtori i kemi bërë analizat tona dhe ato përafërsisht kanë me qenë të njëjta që tash do të shohim edhe në monitor përmes disa sllajdeve që i kemi përgaditë. Për me kuptue ju me mirë edhe me thjeshtësua, unë kam menduar edhe përmes sllajdeve me paraqit KAB-in komunal. Ashtu siç e shpjegoja me herët, buxheti total është prej 14,548,823 euro, granti ka një zvogëlim prej 186,000 euro, në tabelë janë edhe projeksionet për vitin 2021-2023. Ne faqen e dytë kemi një grafikun në formë sferë ku është i paraqitur buxheti në total bashke me grante të arsimit, të shëndetësisë dhe grantin e përgjithshëm të administratës, gjithashtu është edhe Këshilli i fshatit Hoxhë që ka një rritje simbolike prej mbi 100 euro. Tash data 30.06.2020 konsideroj se është data e fundit që e përcakton edhe buxhetin tonë me kategori ekonomike që janë të varura, pozicioni i pagave dhe investimet kapitale. Nëse zbatohet ligji atëherë njëra rritet kurse tjetra zvogëlohet por më mirë shihet edhe në këtë tabelarë. Ne baze të analizave tona përafërsisht si drejtori e Financave, buxheti në kategori ekonomike do të jetë kështu, por me se miri është qarkorja e dytë buxhetore e cila i cakton limitet edhe tavanet buxhetore. Pozicioni i pagave dhe mëditjeve nëse nuk zbatohet ligji i pagave që sipas kushtetutës është data e fundit 30 Qershor, atëherë pozicioni i pagave do të jetë 7,619,177 euro, ndërsa investimet kapitale do të jenë me vlerë prej 4,562,669 euro, do të thotë këtu është ndryshimi pra totali i buxhetit prej 14,548,823 euro e ato janë përafërsisht

projeksionet për vitin 2022/23. Të hyrat vetanake kanë qenë të njëjta po nga viti 2022, zakonisht para se me u zbatua qarkorja e dytë buxhetore, të gjithë drejtorët e buxhetit në nivel komunës i thirrën për konsultime dhe kërkesa të ndryshme. Ne si drejtori kemi menduar se do të kërkojmë se investimet kapitale të rriten të paktën prej 10,000 euro, e kemi shembullin me te mirë pasi të njëjtën kërkesë e kam bërë edhe vitin e kaluar, edhe pse nuk e kanë shqyrtua kërkesën tonë rezultatet në fund të vitit 2019 kanë dalë të sakta ashtu siç kemi kërkuar. Besoj që kësaj here kërkesa jone do të aprovohet me rritje të hyrave vetanake me një vlerë përafërsisht 100,000 euro, atëherë kuptohet edhe buxheti do të rritet në total bashke me grantin e përgjithshëm. Tash në rastin konkret e kemi nëse zbatohet ligji i pagave atëherë pozicioni i pagave do të jetë me vlerë prej 9,112,207 euro kuptohet në dëme të investimeve kapitale pra investimet kapitale do të jenë 3,250,786 euro, ku përafërsisht mbi 1 milion euro do të shkojnë në pozicionin e pagave. Pra këtu është krejt esenca që varet te ligji i pagave që a do të zbatohet apo jo atëherë ka edhe lëvizshmëri edhe buxheti jonë, e sigurisht edhe e dimë saktë sa do të jenë pozicioni i pagave dhe investimet kapitale.

Sali Sallteku – Kur ke pyetja te ligji i pagave, atëherë si duket paratë po merren prej grandeve edhe sa do të jenë me pak pastaj grandet nuk e kuptova, pra këtë po kërkoj ta di.

Afrim Limani – Krejt kjo do të varet nga ligji i pagave do të thotë data 30 qershor, nëse aprovohet ligji i pagave, e thash edhe ne fillim në bazë të analizave tona si drejtori e Financave se më se miri këto përcaktohen në qarkoren e dytë buxhetore, por përafërsisht do të mbetet kështu. Atëherë pozicioni i pagave do të jetë në total 9,112,207 euro pra rritja do të jetë mbi 1 milion.

Rasim Fazliu – Përshëndetje kryesues, nënkryetarin, anëtarët e Kuvendit Komunal, drejtorët e drejtorive, përfaqësues të mediave, të OSBE-së, LMT-së dhe gjithë të pranishmit në sallë. E falënderoj drejtorin për prezantimin e KAB-it për vitin 2021-2023. Unë desha t'i ngrisë disa çështje rreth KAB-it, drejtori i ka paraqitur disa objektiva edhe unë desha të cek se çfarë objektiva kanë paraparë për menaxhimin e ujërave të zeza gjerësisht që moti keni përmend ndërtimin e një kolektori që në bazë të terrenit ndoshta edhe të dy kolektorëve për mbledhjen e ujërave të zeza dhe dërgimin në një impianti që sigurisht që jam i vetëdijshëm se nuk bëhet me mjete vetanake ose me buxhete të Komunës, por Komuna duhet me pas edhe objektiva me kërkuar mjete edhe diku tjetër edhe me i arrit këto qëllime. 1. A janë të paraparë këto objektiva? dhe 2. Rreth menaxhimit të mbeturinave, ne qysh moti kemi pasur këtë çështje të ngritur edhe kemi thënë se nëse Komuna do të kishte mundësi të merret me menaxhimin e mbeturinave edhe të hyrat komunale do të rriteshin, kështu që edhe në këtë drejtim rreth menaxhimit të mbeturinave në këtë KAB-e a është parashikuar diçka? Këto ishin pyetje konkrete rreth kësaj çështje. Tash do të ndalem tek faqe 3, ku thuhet se në Komunën e Rahovecit operojnë mbi 3684 biznese ndërsa në faqe 9 tek tabela 1 ku është indikatorët ekonomik komunal cekët se numri i bizneseve të regjistruara në vitin 2020 është 2450. Desha me ditë këtu se për çka bëhet fjalë se pse është ky ndryshim i shifrave sepse dallimi nuk është bash i vogël afërsisht 1234 biznese. Kërkoj sqarime prej drejtorëve në përgjithësi. A nuk janë aktive ato biznese në këtë ndryshim apo duhet me përmirësuar këto shifra ju edhe KAB-i me qenë ashtu si duhet. Faleminderit!

Fehmi Cena – Faleminderit kryesues, përshëndetje për juve, nënkryetarin, kolegë këshilltarë, drejtorët që janë prezent në sallë, po ashtu e falënderoj edhe drejtorin për Financa për prezantimin e draftit të parë të Kornizës Afatmesme Buxhetore për komunën tonë 2021 – 2023. Në materialin që kemi marr ne kuvendarët, buxheti është i prezantuar blanko edhe granti qeveritar edhe planifikimi i të hyrave vetanake për vitin 2021, ndërkaq atë që e prezantoj me sllajde se është përgatitur edhe pjesa në bazë të kategorive buxhetore. Ne nuk e kemi pasur në material edhe pse në qarkoren buxhetore të parë e kemi vërejtur se aty thuhet decidivisht që Komuna duhet të përgatisë kornizën afatmesme buxhetore 2021-2023 deri më 30 qershor edhe të kaloj në Kuvend por në bazë të kategorive buxhetore, ne shumat nuk i kemi pasur por tash i vërejtëm. Mirë është që është planifikuar sikur nuk do të ketë zbatim të ligjit të pagave por njëkohësisht edhe pjesa tjetër, ajo që është nëse

zbatohet ligji i pagave. Ne kemi vërejt se ka një buxhet me pak sa i përket grantit qeveritar që është ndarë nëpër komuna e tha edhe drejtori dhe për komunën tonë është diku 187,000 euro më pak dhe është paraparë që në grantin e shëndetësisë të ketë një rritje të lehtë ndërsa në grantin e përgjithshëm dhe të arsimit të ketë më pak buxhet. Sidoqoftë në të ardhmen, unë besoj që komuna do të planifikoj pjesën e shpenzimeve buxhetore në hollësi ku do të diskutojmë hollësisht në mbledhjet e ardhshme ndërsa tani isha ndal të pjesa e të hyrave vetanake që është shumale njëjtë që është paraparë sikurse vitin e kaluar 1,156,841 euro nuk ka ndonjë ndryshim. Unë mendoj që kur të planifikohet hollësisht të hyrat, mendoj që komuna duhet të parasheh më tepër të hyra se sa kjo shumë e vitit të kaluar, duke u nisur edhe nga fakti se ne e kemi pasur ne vitin 2019 të hyrat më tepër dhe hiq me larg në mbledhjen e kaluar të kuvendit komunal e kemi aprovuar një kërkesë nga drejtori i financave një shumë të hyrave prej 140,000 që ka qenë tejkalim i buxhetit. Pra poenta është që Komuna të parasheh me tepër, nuk do të thotë që të parasheh më pak dhe pastaj të thuhet se ne e kemi tejkaluar planifikimin por le të jetë më shumë planifikimi dhe ajo do të jetë një angazhim më i madh për qeverinë komunale që të punojnë në mënyrë që të arkëtojnë sa me tepër të hyra sepse sa më shumë të hyra vetanake, do të ketë me shumë buxhet dhe më shumë pastaj edhe realizim të projekteve që është në interes të qytetarëve. Presim që planifikimi i buxhetit për vitin 2021 të jetë sa më i arsyeshëm dhe më racional. Faleminderit!

Afrim Limani – z. Rasim Fazliu i ka bërë disa pyetje dhe unë konsideroj se Drejtoria e Shërbimeve Publike që fatbardhësisht e kemi drejtorin këtu dhe ka një planë për impiantin e ujërave të zeza dhe me se miri pjesa e KAB-it është e përshkruar të gjitha objektivat që janë mbi 13 objektiva në kuadër të drejtorisë së shërbimeve publike, gjithashtu është edhe plani për menaxhimin e mbeturinave. Ndërsa te numri i bizneseve sipas të gjitha gjasave pasi nuk pata mundësi me verifikua atëherë është një gabim teknik po një gjë e di se ne faqen e parë të tabelorja, ne i kemi marrë shënimet me të sakta nga drejtoria për ekonomi se sa kanë qenë numri i bizneseve deri në atë periudhë të përgatitjes së KAB-it komunal. Por gjithsesi ju falënderoj shumë pasi sipas të gjitha gjasave se është një gabim teknik që nuk është përmirësuar. Po ashtu edhe doktori bëri disa pyetje, unë e thashë dhe ne fillim se ne duhet ta votojmë buxhetin me këto parametra pra limite buxhetore sepse formula na ka përcaktua se sa do të jetë buxheti i komunës së Rahovecit për vitin 2021 dhe si i tillë na kërkohet me aprovua. Thashë edhe ne fillim KAB-in si dokument e kam përgatit pjesa teorike dhe gjitha objektivet dhe ka shumë zbrazësi në KAB sepse nuk e dimë pa na ardhë qarkorja e dytë buxhetore për me ditë sakte se sa do të jetë buxheti sipas kategorive. Në momentin kur e kemi qarkoren e dytë buxhetore atëherë edhe këtë dokument KAB-in ne e përgatitim edhe e plotësojmë në hapësirat e zbrazëta. Tek të hyrat vetanake e thashë edhe me herët pasi u bë një pyetje shumë me vend, se tek të hyrat vetanake ne nuk mundemi me ndikuar pasi ata i caktojnë limitet, pra të hyrat vetanake i kanë caktuar saktë sa kanë qenë vitin 2020. Tash ne si drejtori i Financave i kemi konsultimet buxhetore me departamentin e buxhetit në kuadër të Ministrisë së Financave dhe aty ne i paraqesim kërkesat tona. Të njëjtën kërkesë e kam paraqit edhe vitin e kaluar, ku kam kërkuar që të hyrat vetanake të paktën të rriten edhe 10,000 euro sepse ne jemi të sigurt se kemi me arrit këtë objektiv edhe ashtu ndodhi, siç e dini edhe ju të gjithë se ne fund të vitit kemi pasur tejkalim të hyrave vetanake në vlerë prej 139,000 euro. Besoj që kësaj here kur kërkesën tonë do ta aprovojnë sepse kemi fakte argumente bindëse edhe kjo diferencë përafërsisht llogaritet mbi 100,000 euro me bo një kërkesë edhe këtë buxhet me adresue kuptohet që investimet kapitale pasi konsideroj që karshi nevojave dhe kërkesës që ka komuna e Rahovecit janë të pakta pra të vogla investimet kapitale me vlerë prej 3,300,000 euro. Faleminderit!

Rasim Fazliu – Unë desha me u lidhë me pyetjen e doktorit tek të hyrat vetanake, pasi është interesant që në vitet paraprake kur komuna ka realizuar më pak mjete pra të hyrat vetanake kanë qenë më të vogla atëherë planifikimin e bënin mbi 1,600,000 ndërsa tani kur ka ngritje të hyrave vetanake shkohet e kundërta me ulje të

planifikimit, pra është për me u befasua me Ministrinë e Financave gjegjësisht me Qeverinë dhe nuk e di pse po ndodhin këto gjëra. Faleminderit!

Kryesuesi – Faleminderit shume z. Fazliu, atëherë të nderuar kolegë meqë nuk kemi të tjerë të paraqitur, e qesim në votim pikën e tretë të rendit të ditës. Konstatoj se unanimisht aprovohet pika e tretë e rendit të ditës. Kalojmë në pikën e katërt të rendit të ditës:

4. Shqyrtimi dhe aprovimi i Draft-rregullore për taksa komunale.

Kryesuesi – Të nderuar kolegë kuvendarë, para vetës e kemi rregulloren për taksa komunale. Në këtë draft rregullore, grupi punues ka punua një kohë jashtëzakonisht të gjatë mbi dy javë edhe pas orarit të punës edhe janë munduar që të japin të gjithë kontributin e vet duke harmonizuar të gjitha kodet aktuale por edhe kërkesat prej qeverisë. Gjithashtu rregullorja ka kaluar të gjitha procedurat si debatin publik ku kanë pasur mundësi të japin mendimin e vet edhe qytetaret kontributin e tyre. Gjithsesi edhe Kuvendi me datën 16 të këtij muaji ka organizuar punëtori për rregulloren për taksa, ku i falënderoj të gjithë për kontributin që kanë dhënë ku e kemi trajtua kodë për kodë dhe kemi dhanë mendimin edhe kontributin tonë. Po ashtu edhe ne mbledhjen e KPF-së e kemi trajtuar që gjithashtu edhe KPF-ja i ka rekomandua kuvendit që kjo rregullore të kaloj për kuvendë.

Rasim Fazliu – Faleminderit Kryesues, edhe ju e cekët se kemi pasur një punëtori ku kemi trajtuar në mënyrë të ngadaltë dhe kemi shkuar nen për nen këtë rregullore edhe i kemi harmonizuar qëndrimet të gjitha grupet politike që jemi, edhe kemi bërë disa korrigjime në përgjithësi por unë e kam vërejtur që ndoshta edhe kolegët tjerë me ndihmojnë, që ndoshta nuk janë përcjellë të gjitha ato korrigjime që kemi bërë aty, pasi janë disa lëshime që tash edhe me ndihmën e kolegëve do ta shohin se a është ashtu apo unë nuk e kam të qartë diçka. Përndryshe me këto lëshime që janë bërë, që ndoshta edhe dikush tjetër ka diçka dhe unë në emër të grupit them se i kemi krye punët ashtu siç duhet dhe duhet tash formalisht që ta aprovojmë këtë rregullore për taksa. Ne faqe 7, ka qenë lëshimi i certifikatës së përdorimit dhe kemi thënë se ajo duhet të kaloj te Drejtoria e Urbanizmit kurse ka mbetur aty ku është nëse unë nuk gabohem pasi kështu ka qenë propozimi që kjo me kalua te Drejtoria e Urbanizmit por si duket nuk është kaluar. Pra në dokumentin që kemi pasur ne atë ditë në punëtori ne faqe 7 te neni 10, **taksa komunale administrative** pika 16 dhe 17 kemi thënë që duhet me kalua te Urbanizmi pasi kështu jemi dakorduar të gjithë që kemi qenë prezentë. Kurse kjo lëshimi i certifikatës së përdorimit ka mbetur prapë te administrata ndërsa lëshimi i pëlqimit urbanistik dhe dokumenteve tjera urbanistike që kemi thënë se duhet me qenë një vërtetim me quajt ashtu dhe të kaloj në urbanizëm, por ky dokument që na keni sjell për mbledhje të Kuvendit nuk ekziston as te administrata e as te urbanizmi, nëse jo atëherë mund të me ndihmoni pasi unë vetëm po e ngris si çështje. Ndërsa, është mirë që pika 18 këtu në nenin 10, lëshimi i pëlqimit të dokumenteve tjera në fushën e emergjencës kemi thënë te Inspeksioni dhe kjo si duket ka kaluar atje dhe është ne rregull tani. Pastaj kemi faqe 10, pika 11 **anamneza sociale** që kemi thënë që propozimi i kuvendit ka qenë 3 euro kurse nuk është e shënuar hiq në rubrikën si propozim i kuvendit dhe kërkoj që këto ndryshime të bëhen edhe sigurisht që në parim e kalojmë këtë Draft rregullore për taksa komunale. Faleminderit!

Kryesuesi – Faleminderit shume z. Fazliu, me siguri gjatë punës duke bërë kanë mundur të ndodhë ndonjë lëshim teknik gjate shënimit gjithsesi Zyra Ligjore do të kujdeset për këtë për këto ndryshime. Unë konsideroj se ato janë bërë gjatë punës dhe ka mundur me pas ndonjë lëshim në njërën nga shtyllat në Draft rregullore.

Fehmi Cena – Ne si kuvendarë i kemi shqyrtuar draftin e parë të rregullores për taksa komunale në punëtorinë me 16 qershor, edhe unë mendoj se kemi bërë një punë të mirë pasi kemi shkuar për secilin shërbim që ofron komuna me dikasteret e veta. Nuk kanë qenë prezent të gjithë delegatët kuptohet kemi qenë një numër i konsiderueshëm edhe për hir të informimit në dy segmente isha kyq. E para për shëndetësi se edhe atë ditë nuk ka prezantuar drejtori komunal i shëndetësisë edhe sot të sqarohemi sepse besoj që edhe delegatët kanë pasur një draft material me herët ku janë prezantuar edhe disa të dhëna tjera rreth taksave në shëndetësi. Dhe vitin e kaluar ka qenë i formuar një grup profesional me kërkesën e drejtorisë komunale të Shëndetësisë për disa

ndryshime në bashkëpagesa, në pjesën e shërbimeve shëndetësorë mirëpo atë ditë kur e analizuam edhe zyrtari ligjor na tha që ne nuk kemi të drejtë me bo ndryshime në bashkëpagesa që paguajnë pacientët tanë kur ne si shërbyes shëndetësor i ofrojnë shërbimet tyre pranë institucioneve tona shëndetësore. Pra, është udhëzimi administrativ 04/2007 i Ministrisë së Shëndetësisë edhe ashtu do të mbetet pasi ne nuk po mundemi me bo ndryshime. Kërkesa ka qenë më tepër pasi ka pasur ndryshime nga komisioni pasi është kërkuar që të zbriten disa bashkëpagesa sidomos në fushën e stomatologjisë pasi vërtetë duken pak si të tepërta edhe qytetarët kanë pasur vërejtje mirëpo duke pasur parasysh se kjo nuk mundet me u ndryshua sepse është udhëzimi administrativ atëherë do mbetet ashtu. Ndërhyrja e dytë do ta bëjmë tek Drejtoria për Kulturë, Rini dhe Sport është në faqe 30, e konkretisht 31, është fjala për shfrytëzimin e sallave dhe stadioneve për subjektet politike. Edhe atë ditë gjatë punëtorisë e kemi debatuar këtë shërbim edhe disa kemi qenë që të mos tatimohet kjo pjesë pra të mos paguhet taksë sepse deri me tash nuk është paguar se kanë qenë të liruara për tubimet që i mbajnë subjektet politike nëpër salla dhe fusha të sportit. Pra atë ditë gjysma ishin kundër por unë personalisht nuk kam qenë kundër dhe ne jemi konsultuar me delegatët e grupit të LDK-së dhe jemi të mendimit se ky shërbim të mbetet pa taksë sikurse deri me tash, e jo të paguhet 50 euro edhe kisha kërkuar në këtë Kuvend të vendoset edhe kërkoj që delegatet të na përkrahin neve që të mbetet ashtu sikurse ka qenë, me arsyetimin se partitë politike nuk janë grupacione profitabile, nëse OJQ-të dhe të tjerët janë të liruar atëherë perse të mos lirohen edhe subjektet politike edhe ashtu ka qenë deri më tash. Faleminderit!

Kryesuesi – Faleminderit z. Cena, ne e kemi diskutuar gjatë punëtorisë që kishim edhe partitë politike një herë në katër vjet i mbajnë 3 apo 4 takime, qëllimi edhe atë ditë kur kam marr fjalën e kam potencuar që meqë të gjithë duhet me paguar nga të gjitha organizatat atëherë edhe qytetarët tanë duhet ta dinë që edhe partitë politike kur po e shfrytëzojnë një objekt apo sallë të paktën po e paguajnë një shume simbolike edhe unë sigurisht që ende qëndroj prapa asaj që ashtu si jemi marr vesh atë ditë që të jetë një kosto minimale që është prej 50 eurove. Sido që të jetë edhe pse ishim si të përgjysmuar mirëpo qëllimi ishte që me mbet ai propozim.

Rasim Fazliu – Unë mendoj se jemi dakorduar ashtu gjatë punëtorisë por duhet ta kemi parasysh se kjo nuk shkon të njëjës apo tjetrës parti politike, pasi kjo vlen për të gjithë dhe nëse ne dakordohemi atëherë është mirë që mos me pagua edhe partitë politike pasi kjo shkon për të gjithë kështu që nuk është ndonjë problem dhe në parim munden me aprovua rregulloren me ato lëshime që i cekëm me herët edhe me propozimin e doktorit edhe ne grupi i PDK-së e mbështesim që partitë politike mos të paguajnë. Faleminderit!

Ali Morina – Faleminderit kryesues, i nderuar nënkryetar, drejtor të drejtorive, kolegë kuvendarë. Unë po pajtohem plotësisht me pjesën e parë të z. Fazliu ku i dha ato vërejtjet për ndryshimet në tekstin e kësaj rregullore. Ne seancën e parë kur kemi marr vendim për me dal në debat publik, na është prezantuar se qëllimi i ndryshimit të kësaj rregullore është që të unifikohet një rregullore pothuajse e njëjtë për të gjitha komunat e Republikës së Kosovës mirëpo secila komunë i ka specifikat e veta edhe ne jemi munduar që të ja përshtatim specifikat e komunës tonë. Ideja për me organizua punëtorinë për të cilën jemi takuar dhe jemi harmonizuar dhe i kemi diskutuar të gjitha kategoritë e taksave veç e veç dhe i kemi dhanë propozimet tona për të cilat jemi dakordue, besoj që ka dhënë rezultat dhe një praktikë e tillë është mirë me u ndjek për secilën rregullore sepse rregulloret janë dokumente të rëndësishme të Komunës tonë. Sa i përket propozimit të doktorit edhe atë ditë kemi qenë kundër por sido që të jetë ne mundemi edhe me i lirua por ajo shuma simbolike që është kërkuar të paguhet për shfrytëzimin e atyre hapësirave ndoshta kishte ndikuar sadopak në mirëmbajtje e atyre objekteve se vërtet sidomos shtëpitë e kulturës po dëmtohen me tepër kur po ka fushatë elektorale edhe ndoshta po ju bien me u shfrytëzua me shumë gjatë asaj kohe. Faleminderit!

Dervish Çadraku – Faleminderit kryesues, për këtë material ne kemi pasur një punëtori edhe e kemi shtjerrë debatin edhe jemi akordue që për krejt ato pika jemi marr vesh që sot me pas shumë debate por me kalua në mënyrë sipërfaqësore edhe sigurisht që ne nuk jemi fajtorë që nuk kanë marrë pjesë të gjithë pasi kanë

munguar një numër i tyre dhe në këtë pikë tash që folëm në këtë rast jemi dakorduar që kjo me qenë me pagesë edhe nuk ka pasur nevojë që me diskutua tani këtu përsëri sepse jemi marr veshë atë ditë, megjithëse unë mendoj që për me u mbyllë kjo bisedë atëherë është mirë që me dal në votim.

Kryesuesi – Faleminderit shumë z. Çadraku, gjithsesi e ka dhënë kontributin ajo pjesë e punëtorisë që është bërë atje edhe do të procedojmë tutje.

Sali Sallteku – Unë do të dal kundër z. Dervish Çadrakut pasi që të gjithë ata që ishin të pranishëm në punëtori po ata po bisedojnë edhe tani e jo të tjerët pasi kjo edhe atë ditë është biseduar dhe unë kam thënë tekstualisht se kjo do të nxjerrë probleme edhe pajtohem plotësisht me doktorin edhe unë mendoj se është mirë me qitë në votim, sepse vazhdimisht do të nxjerrë probleme. Sa i përket asaj që tha z. Morina me mbajt shpesh punëtori unë nuk pajtohem për këtë sepse është hargjim. Faleminderit shumë!

Kryesuesi - Faleminderit shumë z. Sallteku, edhe njëherë dua t'i falënderoj gjithë kolegët pjesëmarrës aty edhe çështja që e patëm debatuar atje, i kemi dhënë hapësirë që edhe në Kuvend ta trajtojmë edhe atë pjesë të lirimit të pagesës, megjithatë nëse ju kujtohet atje kur kemi qenë atë ditë edhe unë kam qenë që të paktën si arsyetim i pjesës qytetarëve, përndryshe është e vërtetë që mundet me pas kapak telashe por gjithsesi pajtohemi që edhe ta lirojmë edhe atë pjesë pasi nuk është diçka shumë e madhe.

Fehmi Hoxha – Është e vërtetë që jemi dakorduar mirëpo disa lëshime që foli edhe z. Rasimi dhe z. Cena që kemi lanë mundësi që edhe për kuvend me u marr vesh. Edhe një lëshim tjetër që me siguri nuk është shkruar pasi u dakorduam në të gjithë është çështja të neni 18 faqe 12 pika 4, dhënia e pronës se paluajtshme të Komunës në shfrytëzim lokaleve afariste palestra sportive me çmim fillestar nuk ka qenë por që tash po e bëjmë që edhe drejtori këtu e ka propozua 4 euro dhe ne e kemi diskutuar. Pra, atë ditë në parim u morëm vesh që të jetë 4 euro ka parku ndërsa lokalet prapa stadiumit të mbeten 2 euro dhe për këtë jemi dakorduar mirëpo këtu vetëm nuk e keni shënuar, pra vetëm këtë sugjerim të shkruhet 2 euro pasi ashtu jemi dakorduar. Pastaj të neni 20, çmimi fillestar për dhënien në shfrytëzim të tokës komunale (ankand publik) taksa mujore pika 1 është në rregull ndërsa pika 2 qiraja për shfrytëzimin e tokës komunale me qëllim të vendosjes apo ndërtimit të objekteve të përkohshme për aktivitete biznesore është si në vijim, pasi janë tarifat aty. Pra tek pika 2 është dhënia e tokës për vendosjen e kiosqeve kryesisht, pra janë ato ku ka hapësirë ku paraprakisht merren kushtet ndërtimore nga drejtoria e urbanizmit, nëse nuk ka hapësirë pra nuk ka kushte atëherë nuk mundet me kërkua. Kjo shkon direkt me kërkesë të drejtoria e shërbimeve publike e nuk shkon me ankand, pra pika e dyte nuk shkon me ankand por me kërkesë. Këto ishin dy sugjerimet e mia. Faleminderit shumë!

Kryesuesi – Faleminderit shumë z. Hoxha, atëherë të nderuar kolegë kuvendarë, para se me vu në votim, ne edhe në punëtori e kemi shqyrtuar dhe nuk ka qenë ndonjë arsye që me dëmtua dikë por po i referohem kolegut Sallteku që mundet ndoshta edhe të kemi probleme rreth mirëmbajtjes por mendimi ka qenë që duhet me pagua por megjithatë jemi në ata që duhet të vendosim. Atëherë e vëmë në votim që të lirohen edhe subjektet politike. Me 14 vota pro, 13 kundër dhe 1 abstenim. Aprovohet propozimi që të lirohen edhe subjektet politike. Faleminderit shumë, tani e qesim në votim Draft-rregulloren për taksa komunale. Konstatohet se unanimisht aprovohet Draft rregullorja për taksa komunale. Të nderuar kolegë, propozoj 5 minuta pushim për harmonizim dhe ftojë shefat e grupeve në zyrën e Kryesuesit për harmonizim. Të nderuar kolegë kuvendarë, rreth situatës aktuale që po bëhen ftesat nga Gjykata speciale, sigurisht që nuk është e pranueshme për secilin prej neve për çlirimtarët tonë gjatë luftës së Ushtrisë Çlirimtare të Kosovës, që ishte edhe propozim i kolegut tonë z. Hoxha dhe në dakordim me shefat e grupeve parlamentare të Kuvendit, atëherë e ftojë z. Rasim Fazliu që ta lexoj deklaratën.

Rasim Fazliu – Me propozimin e dhënë nga shefave të grupeve të kuvendarëve nga radhët e partive politike të përfaqësuara në Kuvendin e Komunës së Rahovecit për leximin dhe aprovimin e deklaratës, Kuvendi i Komunës së Rahovecit në mbledhjen e rregullt të mbajtur me datën 29.06.2020 unanimisht e aprovon këtë

DEKLARATË

Ne anëtarët e Kuvendit Komunal të Rahovecit, të zgjedhur si përfaqësues të qytetarëve të Komunës së Rahovecit, pavarësisht përkatësisë dhe orientimeve politike, përmes kësaj deklarate shprehim shqetësimin dhe kundërshtimin tonë në lidhje me ngritjen e aktakuzave në vazhdimësi dhe propozimin e Prokurorisë Speciale për ngritjen e aktakuzave ndaj pjesëtareve të Ushtrisë Çlirimtare të Kosovës në ditët e fundit, përkatësisht Presidentit të Republikës së Kosovës z. Hashim Thaqit dhe ish Kryeparlamentarit të Republikës së Kosovës z. Kadri Veselit. Propozimet dhe deklaratat për opinion nga Prokuroria e Specializuar i konsiderojmë të padrejta dhe të pajustificueshme, pasi që lufta e drejtë e Ushtrisë Çlirimtare e Kosovës u mbështet edhe nga bota demokratike. Me këtë rast kërkojmë nga institucionet kompetente vendore dhe ndërkombëtare që të punojnë seriozisht në drejtim të ndërprerjes së praktikave të tilla të ndjekjes së ish-komandantëve dhe luftës së pastër të UÇK-së dhe pjesëtarëve të saj, pasi është vërtetuar botërisht edhe nga institucionet më të larta të drejtësisë ndërkombëtare se lufta e UÇK-së ka qenë e drejtë dhe e pastër.

Ne besojmë fuqishëm se lufta e UÇK-së ka qenë dhe do të mbetet e pastër, pavarësisht tendencave të vazhdueshme të Serbisë për kriminalizimin e saj. Ne e çmojmë lartë kontributin e çlirimtarëve në çlirimin dhe pavarësinë e Republikës së Kosovës. Kuvendi Komunal – Rahovec, 29.06.2020

Kryesuesi – Faleminderit shumë z. Fazliu, të nderuar kolegë kuvendarë e qesim në votim Deklaratën e Kuvendit Komunal të Rahovecit. Konstatoj se Kuvendin unanimisht e aprovon deklaratën që ishte me propozim të shëfave të grupeve parlamentare. Faleminderit shumë!

5. Shqyrtimi dhe aprovimi i Propozim vendimit të Kryetarit të Komunës për faljen e borxheve për taksë komunale.

Artan Asllani – I nderuari Kryesues, të nderuar kuvendarë, ju kolegë drejtorë dhe gjithë ju të pranishëm. Para jush kemi prezantuar propozim vendimin për faljen e borxheve për të gjitha ato biznese që kanë ushtruar veprimtarinë e tyre për periudhën 2000 - 2017 mirëpo që realisht këto biznese janë mbyllura dhe kanë mbetur obligime ndaj taksës komunale. Komuna dhe kuvendi komunal çdo herë ka qenë në përkrahje të bizneseve dhe gjatë vitit 2017 dhe me plotësim ndryshimin e rregullores për taksë tarifa dhe ngarkesa, në vitin 2019 ka marr hapa të veprimit për përkrahjen e bizneseve të vogla, bizneseve prodhuese, artizanateve dhe bizneseve tjera. Duke parë dhe duke analizuar në kuadër të Drejtorisë së Ekonomisë dhe kërkesën e kahershme të kuvendarëve të Komunës së Rahovecit dhe kërkesën e vazhdueshme të auditorëve të jashtëm për rekomandimin zbutjen apo faljen e këtyre borxheve për të gjitha bizneset të cilat nuk ushtrojnë veprimtarinë e tyre në të bërit biznes. Kërkoj nga ana juaj që sot ky propozim të votohet. Faleminderit shumë për mirëkuptimin tuaj!

Fehmi Hoxha – Faleminderit shumë kryesues, po më vjen mirë që pas kërkesës së vazhdueshme që kam bërë ne 3 apo 4 seancat e fundit dhe propozimet që i kam bërë, që ky propozim vendim i kryetarit erdhi për faljen e borxheve për gjithë ata operatorë ekonomik të cilët aktualisht nuk funksionojnë ajo dihet që duhet një vërtetim nga ana e ATK-së të lirohen dhe kjo është shumë mirë. Besoj që në të ardhmen edhe propozimet tjera që tu falen edhe 50% të gjithë atyre që kanë, do të na vije edhe propozimi i radhës ne seancat e radhës. Faleminderit shumë!

Fehmi Cena – Këtë pikë të rendit të ditës, pra këtë çështje e kemi shqyrtuar edhe në mbledhjen e Komitetit për Politike dhe Financa dhe aty sa me kujtohet pikërisht kam kërkuar që në mbledhjen e Kuvendit të kemi disa të dhëna shtesë p.sh. se sa është numri i atyre bizneseve që do të falen nga borxhet që i kanë për taksat e tyre dhe veprimtarinë e tyre të ushtruar për një periudhë kohore goxha të gjatë sepse është periudhë nga 01.01.2000 e deri më 31.12.2017 afër 18 vite dhe dikush nuk e din sa ka zgjatë ajo periudhë, edhe është dashtë se paku numri i bizneseve të jetë edhe shuma e përgjithshme se sa do të jetë ajo shumë që komuna pretendon me i fal bizneseve të komunës tonë. Natyrisht që ne jemi shprehë pro mirëpo për Kuvend është dashtë me pas sqarime sepse këtu jemi 31 delegat që duhet të vendosim. Përndryshe nuk është mirë që kjo të bëhet shprehë për të ardhmen, se ka biznese që gjatë kësaj periudhe që kanë paguar kurse disa nuk kanë paguar dhe kjo nuk

është e drejtë pasi dikush po falet dhe dikush ka paguar, si do të ndikoj në të ardhmen dhe unë besoj që ju keni menduar mirë si drejtori por kur ne nuk i shohim në shënime konkrete atëherë fitojmë përshtypje se ju megjithatë nuk e keni analizuar punën mirë dhe vetëm keni ardhë me një propozim blanco që keni menduar se është mirë. Mendoj që mirë është me i dal në ndihmë por atëherë kur është e nevojshme dhe e domosdoshme pra atëherë duhet bizneseve të ju dilet në ndihmë. Faleminderit!

Rasim Fazliu – Ne këtë problem e kemi pasur në vazhdimësi si Komunë, pra, gjithmonë është ngritur kjo çështje edhe nga Auditori i Përgjithshëm edhe çdo herë ka dalë si borxh por faktikisht ky nuk është një borxh kur bizneset nuk punojnë. Dhe unë konsideroj që pika 2 e thotë qartë këtu, falja e borxheve të papaguar për bizneset të cilat nuk punojnë dhe të cilat janë të shuara dhe nuk e ushtrojnë veprimtarinë e tyre biznesore. Pra është vendim i qartë dhe i qëlluar sepse e thash edhe me herët se gjithmonë figuronte si vërejtje ndaj komunës tonë e cila ka ndikuar negativisht në performancën e komunës. Kështu që, është mirë që ka ardhur ky propozim vendim dhe ne do ta mbështesim këtë vendim edhe jam për atë që të shlyhen këto borxhe që të mos figurojnë. Faleminderit!

Masar Popaj – Desha të di për bizneset që nuk kanë paguar gjatë kësaj periudhe 2000-2017 dhe i njëjti person hap përsëri biznes, si do veprohet me atë person i cili me parë e ka shlye biznesin dhe prapë dëshiron me hap një biznes tjetër.

Artan Asllani – Rreth pyetjes që bëri z. Fehmi Cena, ne në vendim në koordinim me Zyrën Ligjore nuk e kemi parë të arsyeshme me qitë edhe numrin e bizneseve dhe totalin e vlerës që kanë mbetur këto biznese në taksa mirëpo ne e kemi edhe një material që ndoshta ka qenë edhe gabim nuk e kam bashkëngjite propozim vendimit për juve, që bëhet fjalë 661 biznese që realisht nuk janë duke punuar dhe kanë mbetur në obligime afër 280,065 euro ndërsa 63% komuna e Rahovecit i ka të liruara bizneset nga taksa dhe po ashtu i ka mbi 500 biznese që janë aktive me taksë mirëpo ky Kuvend për këtë vit për tre muaj e ka bërë faljen për periudhën mars-maj të vitit 2020. Sipas komisioneve që realisht ka shumë biznese që gjatë kësaj periudhe janë hapur për një arsye apo tjetër dhe ne e dimë që gjatë viteve 2000-2005 kanë qenë disa grande që kanë mundur me përfitua qytetarët që janë kthyer nga vendet tjera të Evropës dhe kanë hapë biznese mirëpo nuk kanë qenë aktive dhe pasi që zyrtari përkatës e bën verifikimin çdo vit bizneseve edhe ju ka vendos ngarkesën mirëpo ata individë apo pronar të bizneseve asnjëherë nuk kanë ardhë edhe me i pa këto obligime edhe realisht borxhi ju ka ngarkuar për shkak se edhe zyrtari nuk ka pasur faj, sepse nuk e ka ditë a është aktiv apo jo. Te pyetja e Masarit për të gjitha ato biznese që morëm vendim për faljen e borxheve dhe nëse çel ndonjë biznes tjetër si do të veprojmë me ata. Ai biznes hapet i ri dhe me emër tjetër që mundet me qenë edhe me emër të vetin që po ashtu mundet me qenë me të njëjtin profil e që realisht me dokumente është biznes i ri dhe nuk kemi asgjë të veprojmë kundër tij. Faleminderit!

Kryesuesi – Faleminderit shumë drejtor për sqarimin, të nderuar kolegë kuvendarë meqë nuk kemi tjerë të lajmëruar për këtë pikë, e hedhim në votim pikën e pestë të rendit të ditës. Konstatojmë se unanimisht aprovohet pika e pestë e rendit të ditës me një abstenim.

Mbledhja përfundoi 12:10

01 Nr. 87/2020
Rahovec, 29.07.2020

Procesmbajtësi:

Agim Hoti

